

四庫全書

史部

欽定四庫全書

史部

江南通志卷一百五十二

詳校官給事中_臣丁雲錦

檢討_臣德生覆勘

總校官編修_臣王燕緒

校對官助教_臣卜維吉

謄錄監生_臣袁榮

欽定四庫全書

江南通志卷一百五十二

人物志

武功二

安徽寧池太廬鳳潁八府滁和廣六泗五州

安慶府

南唐周本宿松人漢南郡太守瑜之後少嘗獨格猛虎唐朱隸楊行密帳下裹冠三軍攻堅摧鋒蒙犯矢石身無完膚及歸營自燒鐵烙其創飲啖言笑

自若出為壽州節度使改鎮廬州加太尉中書令
封西平王本不知書而愛重儒士賓禮僚屬不撓
其權吏民愛之性純樸無他才惟軍旅之事則如
夙習子鄴少驍勇每從本征討本畧地至建州被
圍垂困鄴躍馬救之手殺數十人翼本而出官至
廬州節度使

明楊文勝潛山人膽智過人當紅巾之亂於陽城山
立寨遠近居民爭依之保障數萬人明太祖命徐

達征陳友諒文勝出義師追勦擒友諒參政郭泰
於沙河帝嘉其功授惠州衛承信校尉世襲千戶
畢銀太湖人元末集衆數萬保障一方後歸太祖
鄱陽之戰嘗資軍糧洪武改元授英武衛指揮使
十年改授大河鎮守遼東

石良宿松人謀畧沉斷元末集義勇築城設寨捍
禦鄉里明太祖起兵良籍其土與戶獻之累以功
擢武德將軍英武衛正千戶

陳漢宿松人性沈勇元末盜起漢奮義聚衆明初
歸附授大都督

汪澤懷寧人仕至後軍都督府都督原籍鳳陽其
祖盛從太祖立奇功官都閫奉勅鎮兩廣經安慶
卒遂葬於安慶因家焉澤在宣德間屢著戰功世
襲都指揮使

黃永桐城人靖難兵起以伍卒隨征累立戰功比
定京師拜明威將軍調南羽林衛指揮世襲其職

柳升懷寧人以千戶從太宗靖難歷陞都督僉事
永樂五年俘獲交趾賊黎季犛封安遠伯進侯後
從北征以神機火器大破敵師加太子太傅宣德
初復征交趾連破關隘數十乘勝深入中伏死追
封融國公謚襄敏子溥字廣達襲侯爵正統三年
掛征蠻將軍印充總兵帥湖廣等都司官軍守廣
西征大藤峽殺賊楊容拾等五年討柳州等處六
年破石門等寨十年征思恩賊獲常萬玉等斬之

寇遂平十四年還進太子太師總神機營兼掌右
軍都督府事復守廣西天順改元召進太傅仍掌
營府事又掛平虜將軍印

程翰字鵬舉望江人正統間貢生任湖廣會同縣
令率民兵討平苗洞民立像祀之

黃應甲字汝第懷寧人少習韜畧善騎射嘉靖乙
卯夏倭突至蕪關應甲以一旅禦之於姑孰倭不
得入中武甲科屢遷粵西都事海賊曾一本犯省

城力拒之而遁討古田賊出奇搗虛恢復土宇又
平廣西哈喇洞賊喜金抱廣東洞賊鮑時秀晉大
都督驃騎將軍

吳一介字元石桐城人嘉靖丙辰進士備兵江西
會廣東峒賊卞豹等屠電白詔舉邊才京兆尹畢
鏘薦一介遂移監南越軍以平賊功晉河南布政
致仕

容若玉懷寧人萬厯甲戌進士歷官江西嶺北道

岑賊嘯聚廣中和平諸境若玉攝藩篆假節鉞無程而進先於大龍據要害即調嶺北兵截其歸路遣諜者火其巢穴一戰擒之以勞卒官

國朝張清議字君荷懷寧人明季癸未進士任戶部主事順治初備兵廣東值獐猺跳梁議雨夜進兵一戰擒其魁移川北勦滅西山賊尋致仕子超方孫遇隆皆成進士

邵嘉賓字子雋懷寧人康熙癸卯武舉任福建海

澄守備海寇猖獗隨大將軍進勦有功後海澄陷
嘉賓被執不屈乘間逸歸知賊形勢虛實復隨進
勦一鼓平之恢復海澄以功進秩左都督

林鸞字采五桐城人康熙甲戌武進士任肇慶守
備時粵地多盜鸞奉檄偵緝韶陽單騎入營諭以
恩威寇皆服擢濟南都司以病歸有圖書數卷而
已

徽州府

南北朝齊程靈洗字元滌新安人祖茂為郢州刺史
梁武帝舉兵茂移書責合天正及城陷義不受梁
官靈洗少有勇略嘗手殪妖蜃以安鄉井侯景亂
集鄉兵保黥籍奉表元帝授本郡太守後歸陳累
以戰功封重安縣公卒謚忠壯

唐汪華字國輔新安人少以勇俠聞隋末以土豪應
郡募保據境土并有宣杭睦婺饒五州之地四方
雲擾而境內無事者十餘年至唐武德四年籍土

納款封越國公

吳仁歡祁門人永泰元年方清作亂仁歡率鄉兵數千破之刺史上其事授朝散大夫明年賊平因其壘置縣拜仁歡為令

宋錢畧歙人與弟鬻尚氣節宣和中方臘餘寇未燼畧兄弟起鄉兵討平之建炎三年北兵將溯浙而西畧兄弟逆戰桐廬據牛山之險功聞並授承信

郎

胡閎休字良弼婺源人嘗著兵書靖康元年試中
知兵科帝幸金營閎休結義士欲劫寨迎駕宰相
何鼎禁止之後從辛道宗軍勤王岳飛辟為荆襄
制機有功官至成忠郎

元汪同字仲玉婺源人好武技蹀躞不羈元末寇亂
同起義兵保障鄉里收復饒黟祁婺等已陷州縣
上嘉其勞拜淮南等處行中書省左丞張士誠心
不絕同與史左丞謀約金陵兵取姑蘇為所覺出

兵高郵張士信招與言事遂為士誠所拘同曰吾
以汝為元太尉忠於國家今汝既叛我豈得從汝
反耶遂遇害

明李錫字君寵世襲新安衛千戶征倭有功累陞總
兵官與俞大猷夾擊海寇曾一本擒之以征蠻將
軍代大猷鎮廣信巡撫御史上其功言錫一年內
破賊二百一十四巢獲首功一萬二千餘級宜久
其任許之進秩二等卒於官

國朝江起龍歙人順治中任廣東水師參將駐劄白鵠寨通明港白鵠當郡城入海之口為雷州左臂營署傾圮武備廢弛起龍大修飭之壁壘一新久之遷副將移營海安口出洋捕盜風發舟覆殞焉屢著感異雍正九年封為英佑驍騎將軍之神

寧國府

唐左難當一名匡政涇縣人隋末盜起難當率衆保障武德中入朝授猷州刺史輔公柝反圍猷州固

守逾年李大亮至授以兵遂擊公柘敗之後太宗
伐高麗以李大亮為水道兵總管難當副焉與李
勣李道宗節勇並冠一時

梅知巖寧國人隋季兵亂知巖部伍鄉里帥衆保
障與左難當相犄角盜不能犯武德初與難當同
歸附封南魯王

宋李材字達才太平人宣和末金圍太原材以太學
生上書言三關四鎮國家根本宜速遣偏師倍道

趨雁門入定襄復忻代截石頭關絕其歸路俾腹背受敵朝議以為然命陳淬武漢英等將兵徑收忻代材參幕謀畫居多仕終蘄州通判

元徐用和南陵人有武略至正間海賊熾行中書左丞特哩特穆爾以用和參贊軍務勦撫有功陞都鎮撫上命繪圖傳遠卒賜祭葬

胡有慶涇縣人父武孫任宣城尉以擒賊功陞湖州路同知有慶輕財任俠仕終武昌錄判嘗尉婺源

有三虎白晝入城衆莫能禦有慶連發三矢斃之
明袁洪宣城人少勇敢習韜畧洪武初從軍歷戰有
功特進左都督子容尚燕王郡主以靖難功封廣
平侯

何應龍字子驤南陵人元末里中諸俠少嘯聚應
龍誘其首亂者斬之餘悉蒲伏請命乃散粟結士
部署捍禦鄉井獲安有司上其功授民兵萬戶明
興歸附詔世襲

李遇文字克顯世襲宣州衛指揮陞劉河遊擊時
小琉球三十六人風潮颶至把總陳嘉謨欲指為
倭斬首報功遇文召通事訊實遂遣歸陞湖廣
副總兵會皮林苗叛糾聚八洞據險要遇文攻破
其寨分兵進剿恢復永從縣焚苗巢窟追擒渠魁
王陀於廣西境以功轉左軍都督鎮貴州

沈有容字士弘宣城人萬厯中以武舉為昌平千
總調薊鎮以二十餘卒退朵顏長昂三千騎數出

塞有功遷都司守浯嶼銅山石湖時倭寇剽掠閩
浙有容夜過澎湖與倭遇縱火焚其六舟斬十五
級還所俘民三百七十餘人倭不至者十年紅毛
番韋麻郎艘次澎湖求市有容大聲驚之即引去
擢山東總兵駐登州廣寧失守遼民望海求渡登
撫下令禁之有容固爭具舟以濟活萬餘人以年
老乞歸

孫鎬字西涯太平人以鄉薦知臨潁縣師賊擒良

民黥師宇於面州縣遇黥者即指為師鎬獨下令
曰歸農者民抗鬪者賊黥否勿問衆感泣遂潰尋
知簡州土司有嫡庶爭立者擁兵相持命使往即
殺之鎬從數騎賫詔往從容詢所宜立若未嘗有
詔者久之益習樽酒招延嫡庶咸與席一日鎬指
北山曰今九日也此宜登高嫡庶欣然從之方命
酌忽一吏曰詔至即持庶下斬之事平仕至瑞州
同知致仕

國朝唐邦杰字輔宸宣城縣人順治間以總兵官駐防
仙遊移守寶慶復遷鎮河州平西山巨寇定陝西
保安堡亂兵巡積石枹罕二十四關修邊城八百
五十丈火兒藏野番皆畏威賓服

池州府

明顧成字景昭貴池人太祖起滁陽充帳前親軍以
功歷指揮僉事從平蜀破貴州蠻克普定大兵入
雲南以成斷後扼普定遷都督僉事尋充征南將

軍鎮貴州征五開六硐破一百三十七砦後與靖
難師戰真定兵敗被執成祖釋而用之永樂初封
鎮遠侯又命出鎮貴州搗羅臺斬叛酋普亮羣蠻
震懾尋致仕歸卒謚武毅

紀元憲字蓋我貴池人萬厯甲辰武進士由偏裨
歷廣西總兵官右軍都督僉事掛征蠻將軍印威
名震獍狔又建德檀武臣隆慶二年由武進士歷
神樞營參將為名將戚繼光所重

何自謙字益之銅陵人萬厯中以貢授瓊州府通判時朝廷遣中使至瓊與羣黎市珍異屢有激變相刦殺者自謙每從中調護之得無事後代守入覲回而黎變大作自謙道聞之疾馳渡海合雷陽三路兵搗黎穴冒暑深入用火攻之擒其渠魁十餘人黎始帖服因條撫黎數事上之詔如議以秩滿遷審理又敘平黎功進階長史致仕

金文光字朴石埭人萬厯三十一年武進士官

福建游擊合鄴紅毛倭寇有功歷南贛參將會屬
境土寇踞九連洞為害流毒及閩廣文光以兵深
入鄴平之贛人為立生祠

方儀鳳貴池人萬歷丙辰武狀元授廣東屯田都
司僉書大興屯政以給軍食歷廣東參將紅毛剗
掠海上督兵却之擢南路副總兵著韜畧全書行
世子懋昌由武進士歷貴州安順副總兵撫馭羣
蠻著方略

施臺臣青陽人天啟壬戌進士授龍巖令縣傍海
值紅毛入寇臺臣躬督民兵奮勇逐之寇遁邑賴
以全又建德馮時來明季由舉人授江安知縣土
番寇掠時來集兵固守賊攻城數月不能下始解
圍去

金孔器字璉如建德人明季由貢授蒲臺令有奸
民據海島掠海旁諸邑孔器嚴守備以待之寇不
能犯調崇義督兵平土寇擢南康同知南康接楚

界多流寇山賊往往為之應孔器隨宜撫剿奪還
所掠婦女郡境得安

汪思誠字純一貴池人史可法備兵池州竒思誠
才招致幕下每參軍謀及可法開府江上題授軍
職歷擢副總兵臨陣力戰每脫可法于險後與可
法同死揚州

國朝曹曰瑋字繼武貴池人康熙癸未武狀元授二等
侍衛從征漠北特著勞績出為山西養民路參將

累擢陝西興漢總兵官漢江暴漲州城被水齧盡
圮督軍士晝夜巡防感疾卒曰瑋精騎射通經史
大義居官勤慎馭卒伍嚴而有恩所拔多材勇之
士

太平府

明端宏字仲仁當塗人天順丁丑進士授御史歷按
雲南河南廣西谿谷蠻獠久為邊害宏選將練兵
儲餉設險為攻守計諸洞望風懾服

邢珣字子用當塗人弘治癸丑進士歷南刑部郎
忤劉瑾削籍瑾誅復官知贛州南安龍川盜起珣
引軍逼賊先招降劇盜滿總等後討他盜多藉其
力王守仁征橫水桶岡珣為軍鋒功最宸濠反珣
率兵會守仁進討值南風猛珣建策火攻遂大
破之宸濠就擒以功遷左布政致仕贛人思之立
報功祠祀守仁以珣配二子埴址居官並以清操
聞

裴希度建陽衛人世襲指揮僉事屢立戰功歷福建總兵官海盜鄭芝龍剽劫州郡恃巨艦為長城風帆飄忽瞬息千里希度偵其將至預伏死士舟中人挾長鉤銳斧俟賊近百鉤齊舉固挽之不得脫因舉斧登艦殺賊無算芝龍駕哨船遠遯尋乞降

祝可仕字孟型當塗人鑾孫萬厯庚戌進士授工部主事改戶部督通倉著績歷福建參議紅毛入

犯佐巡撫南居仁籌畫擊敗之遷廣西副使未任卒

廬州府

隋陳稜字長威廬江人大業中拜虎賁郎將擊琉球大破之虜男女數千而歸煬帝幸江都命統宿衛兵擊賊淮上往往克捷遷右禦衛將軍

唐任瓌字子璋合肥人高祖義師起瓌至龍門請謁願為一介使先入關宣布威靈乃授招慰大使說

下韓城以功封管國公與諸將擊破王世充後平
徐圓朗及輔公祐拜邢州都督遷陝州卒

五代王景仁廬州合肥人初名茂章為楊行密將驍
勇剛悍臨敵務以身先士卒梁友寧攻王師範于
青州行密遣景仁以步騎七千救師範大破之遂
斬友寧梁太祖聞之以二十萬兵倍道而至景仁
閉壘示怯伺梁兵怠毀柵而出驅馳疾戰戰酣退
坐召諸將飲酒已而復戰太祖登高望見之歎曰

使吾得此人為將天下不足平也梁兵又敗景仁
全師而歸官潤州團練使後歸梁累官寧國軍節
度使同平章事

宋劉虎廬州梁縣人起農家隸軍籍力戰累功擢副
都統總轄淮陰水陸軍馬拒元師于五河率勇士
乘風縱火中流矢洞腹達背悶絕復甦揮兵更戰
意氣彌厲援壽春自三月至五月戰百餘合卒解
其圍奏凱進利州觀察使拜合肥郡侯

明張德勝字仁輔合肥人與廖永安俞通海等泊巢湖結水寨自固太祖駐師和陽來通款從下太平取集慶克鎮江常州宣州復池州後追陳友諒於采石戰死贈蔡國公謚忠毅

楊璟合肥人本儒家子沈毅好武歸太祖從征陳友諒克九江諸郡縣下廣西征山西平唐鄧南陽佐鎮北平練兵遼東積功封營陽侯贈芮國公謚武信

吳復字伯起合肥人率衆歸太祖於濠嶺前驅積
功封安陸侯追封黔國公謚威毅復平居恂恂至
臨陣奮發無堅不破衝突矢石身無完膚

俞通海字碧泉巢人隨父廷玉來附太祖渡江取
太平金陵畧定常潤蘄黃等處殲陳友諒於康郎
山功最多從征張士誠中流矢卒追封豫國公謚
忠烈

馬雲合肥人洪武四年為都指揮使與葉旺同鎮

遼東設奇出伏破納哈追擊三百餘里殲其衆殆盡上嘉其忠遣使勞之進都督僉事兼總制遼東軍馬十二年征大寧克捷巡邊還卒

俞通源字百川通海弟少隨父兄立功通海卒領其衆攻蘇州擒士誠嗣通海官從大將軍定中原下山東河南北山西關陝征王保保皆先登洪武三年封南安侯從廖永忠伐蜀又從魏國公出塞有功後鎮雲南征廣南諸蠻俘獲萬數弟通淵建

文時豹韜衛指揮戰白溝河死

袁義廬江人本姓張太祖賜姓名數從征伐積功
為楚雄衛指揮使嘗入朝以其老命染鬚鬢還任
以威遠人

廖永忠永安弟永安歿永忠總其兵為水將感陳
友諒于龍江取江西從下蘇湖平方國珍取福建
廣東略定廣西征蜀論功當封公以鄱陽之役有
邀賞意抑封德慶侯

金朝興巢人沉勇有智略元季結鄉里立砦會俞
廖以舟師納款遂率所部來附從渡江征陳友諒
張士誠北畧中原西平蜀夏封宣德侯征雲南至
會川卒贈沂國公謚武毅

花茂巢人從太祖征伐授副千戶平西蜀兩廣有
功世襲廣州左衛指揮使請設沿海依山二十四
衛所築城浚池收集海島諸軍仍于要害之地立
堡屯軍以備不虞皆報可進都指揮使卒賜葬子

英武毅有文畧自以功陞都督僉事

汪興祖巢人初為張德勝養子累功封東勝侯人
有言其過者上弗問亦弗與誥券從傅將軍入蜀
克階文中飛石死詔興祖沒王事授原封侯與世
券

趙庸合肥人元末率舟師來附從征陳友諒張士
誠走張良弼降李思齊多戰功封雄侯

葉昇合肥人自拔采石定金陵平友諒士誠還征

中原三平叛蠻積戰功封靖寧侯鎮遼東六年邊
備修舉

高顯合肥人以功封汝陰侯謚武肅

鄭亨合肥人從成祖積戰功封武安侯充總兵官
備宣府規畫周詳帝凡五出塞亨皆從行率破敵
仁宗即位移鎮大同無寇患宣德初招降酋長歸
附者相屬卒謚忠毅

徐用元合肥人以功封永康侯

陳文合肥人早喪父奉母至孝屢立戰功官都督
僉事卒贈東海侯謚孝勇武臣以孝謚者止文一
人

孫世巢人以功封富春侯

陳清巢人以功封合浦侯謚崇武

左君弼合肥人元末據州太祖再攻之走汴守陳
州遣使持書招諭君弼猶豫不能決乃歸其母於
陳州始感泣納款以副總兵率師討捕底定兩江

徐忠字仲達合肥人父用開國功陞副千戶忠嗣
職進衛指揮僉事鎮開平從靖難兵將前軍敗李
景隆于鄭村壩白溝之戰兩指被刃未殊忠自斷
之裹創進戰大捷歷都督僉事封永康侯卒贈蔡
國公謚忠烈

胡通王珪甯仲英王雄王玉玉弟瑛周顯鄭祥瞿
通皆合肥人明開國時各樹戰功

國朝王承業廬江人任福建中路參將移鎮潮州康熙

甲寅逆藩煽亂以中營副將征賊有功陞總鎮往
勦雲南被重傷歿於營 贈右都督

鳳陽府

三國吳周泰字幼平九江下蔡人隨孫策署別部司
馬策討六縣山賊權住宣城不治圍落而山賊數
千卒至權始得上馬而賊鋒刃已交於左右泰投
身衛權膽氣過人身被十二創良久乃蘇是時無
泰權幾危殆策深德之後從攻皖及討江夏黃祖

有功又與周瑜拒曹操于赤壁攻曹仁于南郡留
督濡須後權欲圖蜀拜泰漢中太守奮威將軍封
陵陽侯子邵以騎都尉領兵數戰有功進位裨將
軍弟承領兵襲侯

丁奉字承淵廬江安豐人少以驍勇為小將數隨
征伐戰鬪常冠軍孫亮即位為冠軍將軍封都亭
侯魏遣諸葛誕胡遵等攻東興奉據徐塘縱兵著
冑持短兵斫之大破敵前屯遷滅寇將軍又與敵

追軍戰於高亭突入其陣中斬首數百進封安豐侯累遷大將軍加左右都護領徐州牧

晉桓石虔龍亢人彝之孫有才幹趨捷絕倫桓冲為苻堅所圍垂沒石虔躍馬赴之拔冲於數萬衆之中而還以寧遠將軍攻袁真於壽陽剋其南城尋進冠軍將軍復領河東太守逐堅兗州刺史張崇冲卒監豫州揚州五郡軍事卒贈右將軍進爵作塘侯子誕嗣

桓石民石虔弟弱冠知名謝安引為參軍以振武
將軍領襄城太守戍夏口冲薨監荊州軍事屢破
苻堅兵以前後功進左將軍

南北朝宋王廣之字林之沛郡相人有勇力大明中
以功補本縣令殿中龍驤强弩將軍屢立戰功封
寧都縣子齊高帝即位歷官鎮南將軍江州刺史
進封應城縣公卒贈散騎常侍車騎將軍謚曰壯
公

梁裴之高字如山遠兄中散大夫髦之子起家州從事新都令遷參軍頗讀書少負意氣嘗隨叔父遠征討所在立功甚為遠所器重戎政咸以委焉壽陽之役遠卒於軍之高隸夏侯夔平壽陽除梁郡太守封都城縣男時魏汝陰來附勅之高接應士民夜反踰城而入之高率家僮與麾下奮擊賊乃散走侯景之亂高率衆入援除特進光祿大夫卒謚恭子畿累官太子右衛率西魏攻陷江陵畿力

戰死之

五代梁馬嗣勲濠州鍾離人也少事州為客將材武有辯歸梁官宣武軍元從押牙太祖西攻鳳翔至華州遣嗣勲說韓建出降後以計為魏攻牙軍中重創卒贈太保

丁會字道隱壽春人也為梁將救張全義于河陽大敗李罕之軍累立戰功為昭義軍節度使昭宗崩會與三軍縞素發哀歸後唐卒贈太師

宋周虎字叔子臨淮人開禧二年知和州金兵圍和
州急虎部分將士乘城拒守母何氏年九十期與
虎偕亡虎益奮勵屢戰斬其驍將金兵引去虎推
功歸母封永國太夫人後轉和州防禦使卒謚忠
惠

元杜昌濠人身長多力至正間以義兵應募有功擢
汝州同知安豐等處萬戶

阮者都世居荆山襲父職守禦浙東值海盜起奮

力擒捕悉平之以功擢浙東道都元帥

明常遇春字伯仁懷遠人猿臂善射從太祖奪采石
為渡江第一功漢吳既平封鄂國公率兵北伐所
至披靡名與徐達相埒暴疾卒於軍追封開平王
謚忠惠遇春為人守謙不矜有功無過運籌決勝
不學而能其從大將軍東征西伐能遵守節制及其
自將所至克捷在上前時有直諫無不嘉納子茂
蔭封鄭國公并開國公

湯和字鼎臣濠人剛毅有智略從太祖征伐所至
皆捷累封信國公後倭寇海上和度地于近海設
衛築城五十有九浙閩賴之功臣中獨以壽終追
封東甌王謚襄武

胡大海字通甫虹縣人長身鐵面智力過人常夜
出目煜煜有光從太祖累建奇功常言吾武人不
知書惟知三事不殺人不擄婦女不燬廬舍後為
叛將所害人無不流涕者追封越國公謚武莊

唐勝宗濠人以從征積功封延安侯鎮守遼東七年威信大著

丁德興定遠人太祖呼為黑丁屢戰立功征張士誠卒於軍追封濟國公

王弼定遠人功封定遠侯

沐英字文英定遠人父母早亡太祖子之既長屢立戰功從傅友德取雲南英生擒達爾瑪長驅而入梁王走死遂留鎮滇中凡十年卒英善撫士卒

在滇百務俱舉卒之日軍民巷哭遠夷皆為流涕
始封西平侯追封黔寧王謚昭靖子春材武有父
風嗣爵鎮雲南七年數立功卒謚惠襄無子弟晟
嗣以討交趾功封黔國公卒謚忠敬弟昂代鎮雲
南卒謚武襄

馮勝定遠人與兄國用俱喜讀書通兵法元末結
寨自保後同歸太祖國用論天下大計以拔金陵
為根本太祖命典親兵數立功早卒追封郢國公

勝先已積功為元帥至是襲兄職破陳友諒下山
東平陝西封宋國公後為大將軍出關降納克楚
二十萬之衆加太子太師

吳良定遠人從太祖為帳前先鋒屢立功克江陰
命守之張士誠不敢北出兵在境十年訓將練兵
新學宮開屯田均徭省賦封疆晏然平吳後移鎮
蘇州又平廣西叛蠻封江陰侯卒追封江國公謚襄
烈弟貞戰功亦多敗張士誠討方國珍擒陳友定

後練軍海上封靖海侯總舟師數萬由登州轉運
盡收遼海未附之地卒追封海國公謚襄毅

耿炳文濠人父君用從太祖為管軍總管戰死炳
文襲職攻張士誠取長興即令守之長興為士誠
必爭地數遣大將來爭炳文拒守凡十年既取中
原鎮陝西浚涇陽洪渠十萬餘丈民賴其利封長
興侯建文時燕兵起炳文年六十五笑命為大將
軍北伐燕兵退帝以李景隆代炳文歸遂敗永樂

初被劾自殺

郭英濠人從太祖數立戰功鎮河南境內大治移鎮北平從征雲南封武定侯鎮遼東召還典禁軍卒謚威襄英孝友通書史行師有紀律兄興從征張士誠有功既取中原鎮潼關移鞏昌邊境帖然封鞏昌侯卒謚宣武

華雲龍定遠人元末聚衆居韭山歸太祖克元都留守北平封淮安侯凡塞上諸關隘衝要之所俱

設兵建燕邸增築北平城在鎮七年威名大著

潘毅臨淮人洪武初從征累有戰功拜虎賁衛指揮使再從西征道卒追贈滎陽伯謚曰武

陸仲亨濠人功封吉安侯

周德興濠人積戰功封江夏侯又以伐蜀克泗城功出諸將上賞賚恒倍會五溪蠻亂德興年已老力請行太祖壯之在楚久威震諸蠻楚人德之

陳德字至善濠人從太祖與陳友諒戰鄱陽湖舟

膠淺力戰身被九矢不退後積功封臨江侯卒追
封杞國公謚定襄

鄭遇春濠人功封滎陽侯

王志臨淮人以鄉兵歸太祖每戰冒矢石先登後
凡用兵皆以偏將軍從持重未嘗敗衄封六安侯
卒追封許國公謚襄簡

張赫臨淮人以義兵應太祖屢立功洪武初倭寇
掠沿海赫捕斬甚多擢都督僉事令督海運往來

遼東十二年封航海侯卒追封恩國公謚莊簡

顧時字時舉濠人由百夫長授元帥積功封濟寧侯鎮北平卒追封勝國公謚襄靖

胡海字海洋定遠人攻城畧地屢戰屢被矢石鋒刃傷而鬪益力太祖壯之既平廣西雲南論功封

東川侯

張銓定遠人累有戰功平雲南功尤多封永寧侯
張龍濠人積戰功封鳳翔侯

李新濠人從渡江數立戰功官都督僉事以營孝陵封崇山侯開贛脂河于溧水以濟漕運民便之李彬字質文定遠人襲父信職從燕師為前鋒累立功封豐城侯鎮廣東捕山寇討長沙賊鎮甘肅獲叛酋老的罕移鎮交趾時中官馬騏激變交人反者四起彬遣諸將分討而賊勢最劇者親自討之潘僚范玉等悉平卒贈茂國公謚剛毅

孫恪濠人興祖子襲父職歷後軍都督僉事積功

封全寧侯謹敏有儒將風進位太子太保

甯正字正卿壽州人沈鷺有膽畧積功擢河州衛
指揮使勤于勞來不數年河州遂為樂土兼領寧
夏衛事修築漢唐舊渠開屯田數萬頃歷四川雲
南都指揮使從沐英討平叛酋卒為左都督代英
鎮雲南

朱能字士弘懷遠人以副千戶事成祖于藩邸與
張玉首倡靖難兵奪九門拔薊州敗耿炳文于真

定敗李景隆於壩上敗平安于白溝河藁城敗陳
暉于潼山敗盛庸于淮直入金川門論功封成國
公永樂四年佩征夷將軍印討安南次龍州卒年
三十七將校皆流涕追封東平王謚武烈

孫巖鳳陽人明初為燕山中護衛百戶燕師起既
得通州以巖宿將命守之南軍圍州城巖多方捍
禦力戰帝即位封應城伯卒贈翼城侯謚威武同
時封伯者陳賢壽州人初從太祖立功為燕山右

護衛指揮僉事從燕師出戰常突陣陷堅封榮昌
伯張興亦壽州人起卒伍為燕山左護衛指揮僉
事以功封興安鄉伯

陳懋壽州人父亨建文時以都督僉事守大寧降
成祖與平安戰中創卒追贈涇國公懋將父兵累
功進右都督封寧夏伯永樂中鎮寧夏善撫降卒
得其歡心擒叛寇進為侯屢從北征有破敵功宣
德初仍鎮寧夏威名震漠北後佩征南將軍印討

福建賊鄧茂七平之加太保卒年八十五贈濬國公謚武靖

何福鳳陽人洪武初中衛指揮同知歷將軍討平都勻越州畢節水西等蠻成祖即位以福宿將俾鎮寧夏節制山陝河南諸軍塞外諸部降者接踵移鎮甘肅降迤北王子以下所部皆內附論功封寧遠侯

韓觀字彥賓虹人高陽侯成子太祖時以父功授

桂林衛指揮僉事討平柳州富川上林宜山全州
灌陽諸徭蠻觀生長兵間綜練武畧人莫敢犯成
祖即位鎮廣西節制兩廣復平定羣蠻移鎮交趾
威名震南中

費巘定遠人襲祖父職從成祖起兵累進都督僉
事鎮甘肅墾閒田以足邊餉善撫士在鎮十五年
境內寧謐封崇信伯

謝成濠人功封永平侯

宋晟字景陽定遠人父朝用以天寧翼元帥請老
晟襲父官歷鎮江西大同陝西討哈梅里克之收
其部落以歸又討廣西幟幪諸寨苗平五開龍里
十三洞招降巴圖特穆爾等部落封西寧侯凡四
鎮涼州前後二十餘年威信著絕域卒追封鄴國
公謚忠順

郭登字元登武定侯英孫正統中從車駕北征以
指揮僉事超拜都督僉事鎮守大同帝既陷也先

數擁帝至城下索金幣登閉門不納而謀遣壯士
刼敵迎帝入城不果敵欲大同為巢穴屢來攻登
屢擊敗之邊軍增氣嘗以意造偏箱車飛天網等
戰守賴之封定襄伯英宗復辟召還憲宗時提督
十二團營卒贈侯謚忠武

趙輔字良佐鳳陽人成化初拜征夷將軍與韓雍
平大藤峽賊封武靖伯又統兵征迤東與李秉從
撫順關深入破之進侯卒謚恭肅

戴紹印鳳陽人自萬戶侯擢三江總戎致仕萬厯
丁酉日本關白犯朝鮮命大司馬邢玠總督征之
紹印杖策往從畫平倭十策卒覆倭以過勞驟卒
大中丞褚鐵檄郡建祠

潁州府

三國魏曹洪字子廉譙人太祖從弟太祖起兵討董
卓至滎陽為卓將所敗太祖失馬賊追甚急洪下
馬授太祖曰天下可無洪不可無君與太祖還奔

譙封明亭侯

曹仁字子孝譙人武帝從弟從破袁術攻陶謙征
呂布平黃巾迎天子都許仁數有功又從圍壺關
武帝令曰城破皆坑之連月不下仁曰圍城必示
之活門所以開其生路今公告之必死將人自為
守非良策也從之城遂降封都亭侯

曹彰字子文譙人文帝同母弟負絕力手格猛獸
太祖每抑之嘗問諸子所好彰曰好為將太祖曰

為將奈何對曰披堅執銳為士卒先賞必行罰必
信太祖大笑北討烏桓身自搏戰乘勝逐北一日
夜追及桑乾大破之後歸報太祖持彰鬚曰黃鬚
兒竟大奇文帝即位立為任城王

曹休字文烈譙人武帝族子年十餘歲攜母渡江
至吳武帝舉義兵乃易姓名間行北歸帝謂左右
曰此吾家千里駒也文帝時以休為征東大將軍
擊吳將呂範于洞浦破之拜揚州牧明帝時封長

平侯

曹真字子丹譙人武帝族子武帝哀其少孤收養與諸子同嘗從獵為虎所逐射之應聲而倒太祖壯其鷙勇封靈壽亭侯累遷大司馬子爽字昭伯明帝時與司馬宣王並受遺詔輔少主後為宣王所誅

夏侯淵字妙才譙人惇族弟從武帝征伐有功封博昌亭侯守漢中戰死謚曰愍

許褚字仲康譙國人勇力過人嘗一手逆曳牛尾
行百餘步漢末聚少年及宗族保鄉里魏太祖徇
淮汝褚以衆歸太祖壯之曰此吾樊噲也引入宿
衛從討馬超韓遂有功遷武平衛中郎將人以其
有力而癡目為虎癡文帝踐阼封牟涇縣公

唐江子建信州人隋末兵起所在殘破子建設柵禦
賊鄉井獲寧高祖武德初以其保護功即命為本
州刺史

五代梁楊師厚潁州斤溝人事梁太祖自太祖與晉戰河北嘗為招討使悉領梁之勁兵末帝謀討朱友珪師厚遣其將朱漢賓以兵屯滑州為應末帝即位封師厚鄴王

王敬瑗潁州汝陰人事州為牙將唐末王仙芝等攻劫汝潁間刺史不能拒敬瑗逐代之即拜刺史為人沈勇有力善用鐵槍潁亳諸州民皆依敬瑗避賊時所在殘破惟潁州二萬戶獨全梁太祖表

為沿淮指揮使歷武寧軍節度使左衛上將軍致仕

張存敬譙郡人剛直有膽勇事梁太祖為行營都指揮使攻滄州敗劉仁恭于老鴉隄還攻王鎔于鎮州入其城取牛馬萬計復攻幽州取其瀛莫祁景四州攻王珂于河中下晉絳二州珂降于梁遷宋州刺史卒贈太傅

徐懷玉亳州雋夷人事梁太祖為將勇于戰陣秦

宗權攻梁壁懷玉擊破之從太祖攻兗鄆破徐宿
金創被體戰必克捷所得賞賚輒分士卒為梁名
將本名琮太祖賜名懷玉從太祖敗魏兵黎陽東
攻兗破朱瑾於金鄉遷齊州防禦使天復四年以
州兵西迎昭宗都洛陽遷華州觀察留後累官保
大軍節度使

南唐張崇慎縣人仕楊吳為廬州觀察使時光州將
王言殺刺史崇在廬州不俟命引兵趣光言棄城

走

宋高瓊蒙城人太宗知其材勇召置帳下積戰功累
官保大軍節度使真宗時為并代都部署中檢校
太尉瓊曉達軍政澶州之役真宗北征中道猶豫
瓊贊決渡河督戰契丹氣沮而退堅守和議數十
年尤善教諸子真宗嘗問卿幾子對曰臣子十有
四人臣誠愚然未嘗不教以知書于是賜諸經史
于其家後曾孫女為宣仁后追封衛國武烈王

高繼勲瓊之子真宗時為建雄節度使善撫御士
卒在蜀有威名繼勲子遵甫官北作坊副使其女
為宣仁皇后神宗時追封繼勲為康王遵甫為楚
王繼勲從子遵惠熙寧中試經義中選累官龍圖
閣學士方宣仁后臨朝繩檢族人一以法度乃舉
家事付遵惠遵惠躬表率之人無間言

張整字成伯亳州潁陽人初為利文州都巡檢使
邊夷歲鈔省地整募死士待其來掩擊幾盡調荆

湖將領結矜萬衆迫黔江城整設伏擊之殺獲不可勝計後為涇原真定京東環慶鈐轄整蒞軍嚴明哲宗嘗召對擢都指揮使官至威州刺史

丁罕潁州人應募補衛士累遷指揮使淳化間出為澤潞團練使知霸州會河溢壞城壘罕以私錢募築民咸德之以容州觀察使與李繼遷戰斬獲數萬拜密州觀察使知威虜軍子守德能世其家王鑑霍丘人為淮西兵馬鈐轄李全犯揚州鑑往

救敗之全走死乘勝復秦楚二州除鎮江都統制
下邳徐二州招納降附措置廬州守禦俱有功封廬
江郡開國侯

明劉才字子才霍丘人元末為元帥明初歸附歷衛
指揮僉事從戰山東每先登有功封廣恩伯永樂
中築山海關復從征至懷來以疾還才不為苟合
亦不輕訾毀人甚為仁宗所重

曹隆程寬俱賴上人從成祖起兵隆以靖難功累

官至都督同知卒追封安陽伯謚忠毅寬積功至
都指揮同知從張輔平交趾進都督僉事卒追封
保昌伯謚忠威

鹿鸚潁州衛舍餘兄弟五人鳳鸞鸚鵡鵬皆勇敢
善射而鸚更軼羣正德七年劉六等破太和圍潁
上鸚昆弟應募守城賊將李龍者號萬人敵鸚與
大戰生擒以歸未幾復擒劇賊李魁寇為喪氣解
圍去都御史彭澤上其功授錦衣百戶而鸚已卒

年僅二十七土人思其捍患功立廟祀之至今呼
鹿將軍廟云

滁州

南北朝隋張獬字文懿全椒人以軍功歷開府儀同
三司封文安縣子從楊素征江表有功授行軍總
管

南唐張訓滁州人楊行密據合肥訓往謁授以親兵
取歷陽及滁孫儒焚棄廣陵訓入城得穀數十萬

斛悉以發賑又襲常州克之即授刺史徙屯漣水
大破汴將龐師古於清河口

明趙奎字思義全椒人體貌魁岸有才畧從太祖渡
江取采石屢立功授總管守宜興洪武四年從征
甘肅猝遇敵衆畏怖奎獨力戰敗之與同縣王才
俱累官都指揮使才亦以材武著

何文輝字德明滁州人元帥世隆孫幼岐疑太祖
鞠養之賜以姓既長嚴毅沈果有遠略授天寧翼

元帥守禦宣州及從征鄱陽皆有功後復姓遷江西行省左丞大都督府同知洪武五年督兵巡居庸關遇疾召還卒

平安全椒人父定濟寧指揮僉事戰歿安襲職擢右都督僉事進副總兵力舉數百斤驍勇善戰靖難兵起安敗燕將房寬陳亨擒薛祿斬王真陳文數窘燕王于陣後為燕所得惜其材釋而用之方瑛全椒人都督政子政死麓川之役瑛時為金

吾衛指揮使發憤報父仇乞兵効死先登破賊遂
平其地進都指揮使後以征貴州及香爐山功歷
進左都督封南和伯鎮貴州湖廣天順初進爵為
侯瑛臨陣勇善撫士以故數有功所至鎮以安靜
卒謚忠襄

陳友全椒人初以騎卒從征授千戶頻建功歷進
右都督鎮湖廣天順初隨瑛征天堂諸蠻破蒙能
餘黨封武平伯進侯卒謚武禧

吳亮來安人初為衛指揮僉事屢從征討宣德中遷副總兵督漕運兼鎮守淮安正統間以平江西新淦賊功佩征南副將軍印鎮貴州尋調雲南累擢右都督亮饒智略屢統軍征討常以不殺為意蠻夷懷附喜文學至老手不釋卷有儒將風

歐磐滁州人成化中為廣東都指揮僉事勦蠻寇守柳州平融縣八砦破鬱林陸川賊弘治中府江永安諸獍亂磐所向摧破進都督僉事佩平蠻

將軍印鎮湖廣請老卒

常道字文載來安人弘治乙丑進士由昌邑令遷戶部主事歷山東參政平萊蕪劇賊有功擢山西巡撫勦撫青羊冠陳卿等旋即莫定

孫克振字養冲滁州人萬歷癸卯舉人歷知東鄉湯溪二縣有聲明季流寇犯滁州克振與同鄉陳國計等協力守禦危城獲全國計亦由明經仕至平樂令

金九陞字允納全椒人萬曆乙卯舉人令棗陽擊賊鹿頭店敗之鄖撫盧象昇奏其功擢南光祿寺署正歷戶部郎中冠犯廬鳳大司馬范景文委督浦口倉儲整飭守具寇不敢逼擢蒼梧兵備副使協平叛猺調湖廣兵備復常寧城定祁陽之變勦八排峒猺會推南贛巡撫引年歸

國朝晉國璧全椒人順治初以貢任袁州推官土賊起守城有功

周球字季珍來安人順治乙未武進士授廣東左
衛守備遷南贛遊擊屢破閩寇前後俘斬以萬計
援剿湖南賊于永興頻戰皆捷歷叙功加左都督
充太原總兵官移真定卒於官子蔚濂皆從軍有
功蔚歷山東運判濂終大理寺寺副孫賡南康熙
己丑武進士選侍衛

和州

南北朝梁昌義之烏江人少有武幹事梁武帝于雍

州義師起收為輔國將軍軍主每戰必捷天監初
累遷徐州刺史鎮鍾離魏中山王元英率衆數十
萬圍城城中兵纔三千義之隨方抗禦殺傷萬計
積屍與城平及救軍至大破魏衆義之率輕兵追
至洛水而還以功進號軍師將軍歷衛將軍再授
北徐州刺史義之性寬厚為將能得人死力及居
藩任吏民安之卒謚曰烈

唐勒思齊歷陽人有神力武后召見竒之授遊擊將

軍李白有勒將軍歌

明華高舍山人元李糾義旅屯巢湖以舟師歸太祖
從渡江取采石金陵授秦淮翼元帥平偽漢及吳
皆有功累遷湖廣行省平章政事洪武三年封廣
德侯給世券後奉使廣東繕邊海城堡卒於瓊州
無子納誥券墓中贈巢國公謚武壯祀功臣廟
仇成舍山人太祖駐師河陽成詣軍門上謁即留
侍宿衛扈從渡江為領軍先鋒每戰奮勇奪陣以

功累遷都督僉事鎮遼東洪武十二年封安慶侯
充征南副將軍勦四川容美諸洞又從征雲南克
普定諸郡卒贈皖國公謚莊襄賜葬鍾山

王銘字子敬和州人從俞通海下采石嘗與偽吳
戰流矢中臂引刀出鏃復前力鬪一軍壯之凡大
小戰數十數有功洪武初授指揮使統溫州衛有
威名多惠政加築外垣起海神山屬郭公山首尾
二千餘丈屹然東浙巨鎮云又州人胡淵亦以材

勇從太祖立功累官都指揮使

楊文舍山人父興以驍勇事太祖為總管歿于鄱陽之戰文襲領父兵屢有功累官右軍都督洪武三十年掛征南前將軍印征五開諸蠻平之立銅鼓等衛尋又充總兵官備禦開平召還卒

徐義和州人少有大志好讀孫吳書從太祖渡江每臨敵陣輒躍馬揮刀作虎吼衝突衆皆披靡以前後軍功累擢建寧右衛指揮僉事又州人沈興

亦從太祖定江南受爵賞

紀清舍山人洪武中以從征功歷濟陽衛指揮後
又從成祖靖難有功遷右軍都督僉事

李濟和州人父旺事太祖立功授燕山左護衛千
戶濟襲職從成祖靖難累遷都指揮同知封襄城
伯出鎮江西平永新盜尋召還卒子隆嗣爵

李隆字彥平年十五襲封襄城伯氣概英偉成祖
異之八年扈駕北征有功十四年留守南京仁宗

時出鎮山海威望遠著尋復守南京先後凡十八年正統五年入總禁兵十一年巡邊明年卒隆雖總軍政謙己下賢務循大體臨邊申飭守備內外整肅訖還不戮一人子珍嗣封死土木之難無子弟瑾嗣成化三年充總兵官平川貴諸蠻卒謚莊武

國朝張翰字萬屏舍山人由贛州城守千總援寧都石城皆有功自守備攝福清營遊擊康熙十九年從

征臺灣大敗逆賊林陞等進廈門取金門掃平逆
穴特授左都督補廣東右翼鎮遊擊歷遷永固城
副將

廣德州 武功無

六安州

漢英布禹封臯陶後于英六子孫以英為氏布其裔
也有相布曰當刑而王坐法黥因稱黥布始從項
羽封九江王後歸漢封淮南王

明朱亮祖六安州人元末義兵元帥明祖克寧國擒之喜其勇悍俾仍舊官居數月復叛去遣徐達討之常遇春被創而還上自往督戰亮祖敗縛以見上曰爾將何如對曰生則盡力死則死耳上壯其言留置麾下從軍四征所向克捷從征陳友諒下江西諸郡討陳友定取浦城克崇安建陽等處張士誠寇諸新城擊降其平章潘元明討方國珍克其城徇下諸縣方氏父子降洪武元年與廖永忠

征南取廣東進取廣西封永嘉侯四年助傅友德
平蜀還鎮北平移鎮廣東

葉旺六安州人從徐達等北征積功為指揮僉事
洪武四年與馬雲同鎮遼東大破納克楚于連雲
島論功進都督僉事在遼十七年修城隍立官府
墾田萬餘頃嘉靖初命有司立祠遼東祀之

國朝黃鼎字玉耳六安人明季李自成據南陽鼎糾合
義勇擒殺偽署州縣擢總兵官駐光固 大兵南

下鼎歸誠鎮安慶平定池陽水賊各營流散婦女
以千計悉遣令還家總督馬國柱題留參決機
務勦張福寰鼎功居多

泗州

漢陳嬰本東陽令史居縣中東陽少年殺其令欲立
嬰為王嬰母謂曰我為汝家婦未聞先世有貴者
今暴得大名不祥不如有所屬嬰乃止後歸漢封
崇邑侯

唐劉行舉盱眙人天后時徐敬業起兵揚州行舉與
楚州刺史李從福連和城守敬業平拜遊擊將軍
宋劉綱招信縣人位之子靖康時常保聚橫山今山
上有墩人呼摩旗墩相傳為綱建旗之處移鎮淮
揚遷洪州總管

明李文忠字思本盱眙人太祖姊子年十二母薨太
祖擇師教之初以舍人領軍南北征討驍勇為諸
軍冠所至有功後封曹國公文忠器量沈閎臨戰

必身先士卒戰勝必以功推下及釋兵家居恂恂
若儒者卒封岐陽王謚武靖

耿天璧五河人再成子隨軍安慶湖廣下南昌聞
處州軍亂父死疾馳至集舊部曲討賊帥李祐之
等誅之襲父職仍命守處州累立戰功歷杭州衛
指揮同知世襲

費聚字子英五河人同耿炳文守長興屢敗張士
誠又會湯和討方谷珍降之又進取福州破延平

從徐達定中原取關中鎮守平涼封平涼侯後征雲南有功遂鎮之召還坐黨死

周長天長人善騎射為燕山中護衛從軍靖難戰白溝東昌藁城皆有功永樂九年與尚書宋禮侍郎金純治漕渠修復會通河置十五牐濬黃河故道以殺水勢卒贈萊陽伯

張庶天長人起行伍從靖難兵南下有功又隨成祖北征塞外累官都督僉事卒追封榆次伯

江南通志卷一百五十二

欽定四庫全書

江南通志卷一百五十三

人物志

忠節

一 江蘇松常四府

江寧府

南北朝宋張約之崇邑人耿介不阿授吉陽令景平
元年朝議廢廬陵王約之疏諫不納遂見殺

梁顏見遠晉侍中含六世孫為齊御史治書梁武帝

受禪見遠痛哭而死

唐劉鄩字漢藩句容人為李德裕掌書記咸通初擢
左拾遺召為翰林學士德裕以朋黨抱誣死鄩申
直其寃復官爵後為左僕射黃巢亂僖宗西狩鄩
追乘輿不及為賊捕急不肯屈遂見殺

南唐李元清濠州人徙金陵李後主以吉州永新與
湖南鄰命元清為永新制置使每數月一托疾不
坐衙微服入湖南境以故敵人動息皆知之國亡

歸京師元清僞稱失明召驗之揮刃將及頸目不
為瞬乃放歸

宋秦傳序江寧人淳化中充夔峽巡檢使李順之亂
賊攻夔州督兵拒戰力竭乃為蠟書報上赴火死
其子奭泝峽求父尸溺死時以為父死忠子死孝
奏至太宗錄其次子為殿直賜錢十萬

劉綰深水人累官安撫使死靖康之難

秦鉅字子野江寧人檜曾孫嘉定間通判蘄州城

陷鉅與郡守率親兵巷戰死傷略盡鉅歸署疾呼
吏焚倉庫自投火中老卒冒火挽出之鉅叱曰我
為國死若輩可自求生掣衣就焚而死二子浚澤
皆從父死後封鉅義烈侯子贈通直郎立廟蘄州
元趙龍澤字萬里溧水人為人剛果有幹才授雷州
清道寨巡檢侍養不仕時汝潁兵起陷建康龍澤
不屈而死子權亦從父死

明孫炎字伯融句容人博學雄辨太祖下集慶召見

炎首勸收攬俊傑克處州以炎為總制招劉基不至炎貽書數千言始來見處州故賊衝苗軍作亂脅降炎炎不屈賊饋酒炎炎大罵賊怒叱使解衣炎曰此紫綺裘吾君所賜當服以死遂見害後追封丹陽縣男

齊泰溧水人洪武中進士累官兵部尚書受顧命輔皇太孫時諸王皆尊屬擁兵專制地嫌勢逼泰請詔諸王毋奔臨王國吏民悉聽朝廷節制諸王

不悅謂齊尚書問我也後靖難兵至泰被執不屈死

張益字士謙江寧人永樂乙未進士正統時遷侍讀學士知制詔詞翰敏贍時稱文豪從征歿於土木之難贈翰林學士謚曰文僖

王一居上元人擢太常贊禮郎宣德初舉南郊禮儀度醇雅特遷少卿正統時死土木之難

黃宏字德裕六合人弘治壬戌進士由萬安知縣

歷江西叅議九江盜起宏平之宸濠叛一時迫脅者多得釋宏不從以手械倚柱蹙項死暴屍數日濠誅贈太常少卿祀旌忠祠

鄭璫江寧人弘治己未進士知新喻縣遷部郎出守南昌時宸濠蓄異志潛招巨盜劫江淮間璫捕之每事裁抑濠誣奏璫捶殺王府校尉構錢寧矯詔撫按究治濠令校尉先械入府辱之萬狀乃送有司濠反械繫之小舟忽風吹船開見隣船舊兵

獻諭以禍福衆共釋其縛奪馬潰圍登岸一呼從者千人斬賊將范成等赴贛撫王守仁軍門備陳賊勢請速進兵賊平上以獻抗逆不屈斬獲有功擢山東鹽運使

何遵字孟循江寧人正德九年進士授工部主事榷木荊州不私一錢帝將南巡以進香東嶽為名遵抗言淫祀無福權倖見疏遏勿進遵復上書乞罷巡幸極言江彬怙權倡亂請寬宥諫臣黃輩等

不爾臣願與同死帝怒廷杖四十肢體盡裂而卒
王鑾字汝和應天人正德辛未進士試政吏部為
原治二篇太宰楊一清器之補文選主事晉驗封
郎中諫武宗南巡廷杖傷踰年卒

陳六奇字鳴驚上元人萬曆戊午舉人知南寧縣
流寇內訌雲南大亂曲靖為土酋所據知府焦潤
生死之六奇被執不屈閹門遇難

童仲揆字元圃孝陵籍萬曆戊戌武進士猿臂

善射有古名將風為四川都司經畧熊廷弼聞其名疏調軍前屢立戰功後與石砮土官秦邦屏率師渡河衆寡不敵仲揆揮短兵接戰中弩死贈都督廕其子

張可大字觀甫應天人萬厯辛丑進士由守備歷舟山叅將城久圯可大築之海潮害稼築碕蓄淡水田遂為膏腴懷宗初為登萊總兵官平島帥劉興治之亂內陞左軍都督聞兵變回登州為戰守

計城陷題壁自署盡節處乃自縊謚壯節

胥自修字二如江寧人萬厯壬子舉人令曲陽治
為三輔最艱闕補宜黃令以捕奸忤當事左遷衢
州府檢校轉光祿監事未赴聞流寇陷北都具冠
服北向肅拜絕粒而卒

姚九疇字庚先江寧人為浦口守禦崇禎八年冬
從遊擊汪之斌援江浦與流寇戰連敗之城賴以
完之斌欲搜山九疇阻之不聽中賊伏九疇率所

部往救出斌於重圍賊虜至援絕矢窮誘降不屈
罵賊死郡人殉節於流寇之亂者有四川崇寧縣
知縣劉旋貴州司主事徐有聲安慶叅將潘可大
曲靖知府焦潤新鄭訓導談王道

梁志仁字霏玉江寧人由鄉貢授衡陽令抵任即
立易徵便民之法改羅田縣流寇羅汝才攻城城
陷志仁持矛巷戰殺六賊力竭被執賊碎肢體而
焚之妻唐氏亦被殺事聞贈蘄州知州姪壻令仙

遊耿逆亂被執不屈

蘇州府

三國張純字元基吳人父敦德量淵懿善文詞為海
昏令有惠化純學博才秀尤勵操行拜郎中補廣
德令治有異績推太子輔義都尉赤烏十三年廢
太子和純極諫權幽殺之

朱據字子範吳人張溫薦其才兼文武可繼呂蒙
拜建義校尉領兵屯湖孰黃龍元年徵尚公主拜

左將軍赤烏中遷驃騎將軍遭二宮構爭據擁護
太子言詞懇至義形於色守之以死左遷新都郡
丞追賜死

晉張禕吳郡人敬子少有操行為恭帝郎中令劉裕
知禕為帝所親信封藥酒付禕密鵠帝禕曰鵠君
以求生何面目視息世間哉自飲而死

南北朝齊陸超之吳人江州司馬隆昌元年宣城公
鸞專廢立晉安王子懋起兵約超之同事鸞遣于

琳之害于懋琳之勸超之逃亡對曰吾若逃非惟孤晉安之眷亦恐田橫客笑人端坐俟命超之門生以殺超之當得賞密自後斬之頭墮而身不僵殮時門生亦助舉棺棺墜其身折脛而死

陸閑字遐業慧曉兄子有風槩不苟合少為張緒所知仕至揚州別駕永元末刺史始安王遙光據東府作亂或勸去之閑曰吾為人吏何可逃死臺軍陷城閑以綱佐被收尚書令徐孝嗣啟閑不豫

逆謀未及報徐世標命殺之子四絳厥完襄

張冲字思約吳人宋臨沮伯邵孫少有至性仕齊
為青冀二州刺史遷郢州梁武帝起兵手書諭意
又遣辯士說之冲確然不回明年梁兵圍之冲固
守不出病將死屬府僚以誠節言終而卒贈散騎
常侍

梁許孝敬吳人勁勇過人為梁宣帝驍將守河東陳
吳明徹攻之孝敬以無援被執戮於建康贈車騎

大將軍

張嶧字四山吳郡人敦孝行年三十餘猶斑衣受父杖收淚歡然仕梁吳興太守侯景攻之遣使說降嶧怒斬其使親出督戰城陷被執景欲捨之嶧罵不屈乃并其子弟十餘人俱遇害景欲全其少子嶧叱曰吾一門已登鬼錄不就爾處求恩俱死唐張鎰字季權崑山人以廕授左衛兵曹叅軍累遷殿中侍御史會齊誦構廬樅罪鎰按驗知其誣執

正其罪縱得流鎡以是坐貶大歷初為濠州刺史
以最屢遷拜中書侍郎平章事盧杞忌鎡剛直出
為鳳翔隴右節度使德宗幸奉天鎡將傾家貲自
獻行在營將李楚琳作亂鎡與二子俱遇害詔贈
太子太傅圖形凌烟閣

周撲字大撲吳人有詩名羈泊閩中黃巢陷郡偏
其降撲曰我尚不仕天子豈從賊乎遂見害既刑
項中湧出白膏數尺閩人祀於薛老峯

宋王玠字介玉長洲人倜儻負氣紹興初孔彥舟鎮撫舒蘄聘為幕屬彥舟有異志欲降劉豫問計於玠玠正色喻以逆順彥舟怒囚之越數日復問玠曰君不能立功報君父而甘心與逆賊比誠欲反幸先殺我彥舟竟沉玠於龍眼磯鄉人為立祠於磯上

邊知章字公望吳人高祖肅真宗朝知邢州澶淵之役密詔便宜退保肅匿詔抗敵并納旁郡鎮魏

六州老弱全活者數十萬知章崇寧進士歷官通判開德府靖康初北兵以和議退明年將復動知章適告滿代者避禍愆期澶淵當孔道或勸逃去知章寓書於平江諸弟謂苟求幸逃豈不愧守邢匿詔事乎藉使非力所能而死當見吾祖地下無醜顏其冬敵至城下軍潰死之贈朝散大夫弟知白字公式官至吏部尚書孝友篤實循蹈規矩清虛寡欲號為吉人

滕茂實字秀穎吳人元發從子靖康初出使於北
遷代州屢誘脅之弗為動顧自度不能生還乃自
為哀詞復篆宋工部侍郎滕茂實墓九字裹以奉
使黃幡密授其友董詵屬以後事欽宗北狩舊臣
無敢問起居者過代州茂實獨具冠裳迎謁拜伏
號慟州人皆感泣茂實請從駕不許竟憂憤成疾
卒人哀其忠為起墓臺山寺歲時祀之建炎二年
張浚上其事追贈龍圖閣直學士謚忠節兄洵通

判代州兵入境徇率衆守城力屈為所拘劉豫以太府卿召執節不辱而死

郭元邁字英遠吳人博通經史入太學魁上舍建炎二年以和州團練使充通問副使次河朔以書抵家云出家當艱棘時難保生還此身已許國矣至北上書乞歸二聖遂留之不遣洪皓歸言其以身殉國棄之不取何以使人元邁卒死北邊

鄭凝之吳人戡之孫也建炎中為浙西安撫使機

宜建康潰卒犯鎮江凝之死於兵詔官其家

朱良字良伯吳人為海鹽尉兵入境良謂僚友曰
此正忠臣義士殉國難時也披甲執戈集部兵七
百餘奮前擊之衆為披靡然力不敵竟死

元楊椿字子壽吳人讀書過目成誦工古文詞丙申
歲元總兵參政脫寅時守吳辟為參謀伴守婁門
甫二日張士德兵至城下衆潰去椿獨擐甲匹馬
突入與戰身被數鎗度不支且大罵兵以戟裂其

口血被體罵不絕而死

陳普字季周吳人嘗從楊椿遊好學而文尚氣節
張士德入吳兵踵其門使拜不屈且索婦女普大
罵遂被數創而死

明鄧彥章字朝用常熟人洪武中以賢良方正擢御
史清介忠直以諫賜死

劉政字仲理長洲人力學敦行誼建文元年鄉薦
第一主考方孝孺書其卷曰此烏中孤鳳也政感

其知遇以忠義自許靖難時感憤不食死

黃鉞字叔揚常熟人家貧無書日游書肆借觀輒
記不忘與方孝孺姚善友善建文二年進士仕刑
科給事中憂居聞孝孺被戮遂慟哭不食及善死
起登琴川橋再拜哭曰君與希直同報國吾忍獨
生乎奮身入水死

龔詡字大章崑山人父謦洪武初以給事中謫戍
五開死詡年十四勾補伍守金川門靖難兵入大

慟變姓名王大章遁跡田間肆力經書周忱撫江
南兩薦為學官堅不應曰謝老兵仕無害恐負往
日金川門一慟耳卒無子門人私謚曰安節先生
王永和字用節崑山人永樂甲午中應天鄉試官
兵科給事中劾錦衣衛指揮馬順欺罔持節冊封
韓王世子妃糾正中官褻傲歷晉工部侍郎正統
以後死於土木之難贈官廕子謚襄愍

欽謙吳縣人官太醫院判宣宗數召見問秘方三

問以不知對最後譙伏地曰臣以醫職在保護聖躬陛下承祖宗鴻業宜兢兢自愛若此等方藥先賢不傳臣死不敢承旨宣宗怒命武士以旃裹頭付詔獄久之上悔悟釋出復其官正統末隨駕出關殉土木之難

程式字以則常熟人宣德癸丑進士歷刑部員外郎土木之變扈從死難以衣冠歸葬天順改元錄其子入監所著有兵政十策葩經行義

蔣欽字子修常熟人弘治九年進士歷官御史正德間劉瑾專恣逐大學士劉健謝遷欽與戴銑薄彥徵等奏健遷先朝顧命大臣不可逐又諫上宴朝廢學與瑾等馳驅射獵非人君體瑾矯旨皆廷杖削籍欽益慷慨獨上疏前後凡上疏者三廷杖者三遂卒瑾誅贈光祿卿謚忠烈

唐天恩字堯仁常熟人弘治戊子舉人授葉縣知縣時劇賊劉七徒黨擾河朔天恩增城塹繕器械

未幾盜抵城下嬰城守二十餘日城陷被執及其父政懸之庭射殺之庶母任氏二妹皆遇害事聞贈光祿少卿廕子

陳淮字禹治崑山人禦倭寇遇害子應期舉於鄉瀝血上陳詔旌其門立祠曰忠烈

錢泮字鳴教常熟人歷官江西叅政所在有聲以憂歸里時倭寇方熾邑令王鐵既連却之值倭刼關稅巨萬取道尚湖入海洋與鐵率兵邀之墮伏

中力戰而死贈光祿卿廕子建褒忠祠

徐察常熟人格之裔孫倭寇常熟統家丁抗敵三丈浦斬獲甚衆王鐵錢泮之難察亦死之詔贈官廕子

宗禮常熟人世官應天衛千戶歷都督僉事驍勇敢戰嘉靖間以倭亂調援浙西遇賊帥徐海於阜林三戰三捷以九百騎破其萬衆海辟易稱為神兵論者謂軍興以來血戰功第一竟歿於陣詔贈

都督同知謚忠壯賜祠阜林

趙士端字正叔常熟人以歲貢授仙居訓導倭寇
越中令被害知士端為廣文也將釋之士端瞋目
大罵倭斷其首止以身歸葬

顧天叙字禮初崑山人萬歷戊子舉人歷知鉛山
元城嘉魚三縣以子錫疇貴即棄官不仕屏居讀
書及國事危殆趣子南行錫疇以父老戀戀不忍
舍天叙曰吾自盡我當盡之節汝自為汝當為之

事卽絕粒以死

徐如珂字季鳴吳縣人萬歷乙未進士授刑部主事坐謫復起歷遷川東副使奢崇明叛戕蜀撫於重慶據之而以重兵圍成都如珂甫入境聞之卽召募檄調得兵千人急攻重慶破之成都之圍以解合兵直搗賊巢破古蘭斬萬餘級焚偽宮闕叙功第一擢太僕少卿轉左通政吳民擊殺緹騎閹黨議阮吳城如珂抗言曰蘇州財賦重地此令下

揭竿反矣當國者心動事得解如珂積以事忤閹
奉嚴旨削籍既行遣盜至舟中殺之不獲抵家甫
半月知閹怒未已治具召親好道故歡飲夜分飲
藥而卒

顧大章字伯欽常熟人萬歷丁未進士官刑部員
外時東林議起大章雖不預東林而陰為居中幹
旋閹黨深忌之先是經撫之獄大章引八議欲貫
熊廷弼罪廷弼楊連鄉人也閹黨謀以鬻獄坐大

章以關通罪楊漣左光斗則一網可盡於是楊左五人先後考死獨移大章刑部定爰書欲以厭天下口大章曰某自誣服又代五人誣服何以見五入地下乎飲藥未絕又雉經而死時有芝產獄中一莖六瓣大章與楊左等六人每一人死芝萎一瓣大章作瑞芝記懷宗中贈太僕少卿謚裕愍王佐聖字克仲長洲人萬歷壬子舉人知遵義縣土酋吳上才郭士奇等叛佐聖督兵深入計縛上

才士奇等奪還所掠男婦三百餘口賊黨欲竄奪
所檻烽火告急援兵不至賊梯城入佐聖橫劍奮
呼與賊戰面受三刀以死士民立廟祀焉

周宗建字季侯吳江人萬歷癸丑進士知武康仁
和二縣胥著能聲擢御史客魏表裡擅權宗建前
後彈擊疏凡四上璫憾甚誣以賊下詔獄考死懷
宗間贈太常少卿謚忠毅

周順昌字景文吳縣人萬歷癸丑進士授福州推

官稅監高案橫斂虐民民情洶洶不測順昌仗義
抗案衆遂解散上聞撤案歸順昌召拜吏部主事
遷文選員外郎謝絕請托失要人意引疾歸嘉善
魏大中以首攻魏閹被逮過吳順昌與之決以女
字其孫閹黨倪文煥訶得之誣奏逮問緹騎至吳
士民大譁訟寃移時而集者萬餘輩緹騎手銀鎗
擲之衆怒擊殺緹騎留順昌不得發順昌潛行赴
詔獄拷掠無完膚厲聲罵閹鎮撫許顯純槌其齒

盡落順昌噉血濺其面卒誣賊死獄中崇禎初贈
太常卿謚忠介子茂蘭見孝義傳

龔元祥字子貞長洲人萬歷乙卯舉人授霍山教
諭崇禎乙亥正月流賊破霍山元祥肅衣冠秉笏
坐明倫堂賊挾刃脅之不動罵賊甚厲遂縛之過
文廟曰此吾死所也觸賊死之季子炳衡抱父躄
踊呼號罵不絕口賊又殺之贈國子助教建忠孝
祠

邑文達字行甫蘇州衛指揮崇禎乙亥流寇掠鳳
安奉巡撫檄統兵進援兵械草草人無鬪志進戰
伏發官軍鳥獸散或勸文達遁按劍叱之力盡戰
死土人立邑將軍祠

夏萬亨字元禮崑山人萬歷戊午舉人知西平縣
築城治隄練兵保中稱能吏歷陞按察僉事分巡
南瑞南昌兵潰死之一家從死者二十餘人

蔡懋德字維立崑山人萬歷己未進士除杭州推

官歷陞嘉湖井陘濟南諸道有殺賊功廷臣以知
兵薦巡撫山西時闖賊陷潼關孤軍拒戰巡按汪
宗友誣劾失援平陽有旨解任或謂懋德可循例
出境候代懋德曰此時存亡呼吸奈何藉口以自
便守危城三晝夜無援城破入三立祠自縊死將
吏應時盛等四十六人從死焉後謚忠襄予祭葬
建祠以應時盛祔

趙廕字任卿吳江人天啟辛酉武舉崇禎九年巡

撫張國維檄為守備屯太湖縣賊至廕提兵與戰
賊敗走廕追至通湖據山為營賊以百騎來山前
挑戰而以千餘騎從山後襲營廕手刃數賊被執
不屈死焉事聞贈指揮同知安慶人祠之

毛維張字國卿吳縣人為長子縣丞署邑篆值魏
鐫矯旨遣使查弔府縣庫銀維張預備一冊言邑
小糧輕徵解無餘使者信之迄鐫敗山西一省獨
長子縣庫銀無缺還北直河陽衛經歷巡城有功

賜宴加級闖賊破彰義門酷刑逼降罵賊不屈而死

徐汧字九一長洲人事母至孝諸生時即以名節自任魏大中被逮過吳汧不識大中典簪珥易金贈之周順昌歎曰國家養士三百年如徐生者真歲寒松柏也後順昌被逮緹騎橫索錢汧復與楊廷樞斂財經理之崇禎戊辰成進士選翰林庶吉士授檢討嘗以直言忤旨詰責抗論如初屢遷右

庶子奉使旋里久之北上抵鎮江聞京師陷一慟
幾絕及南京失守肅衣冠北向稽首投虎丘新塘
橋下而死

顧繩詒字敬承長洲人崇禎庚午舉人知仁壽縣
獻賊狃勢日熾西川失守或來說降厲聲叱之
馳馬至學宮從容拜先聖望北稽顙縊死順治己
亥子珽琦扶柩歸葬

宋學朱字用晦長洲人崇禎辛未進士為御史劾

楊嗣昌田維嘉天下壯之巡按山東濟南圍急登
陴守禦火焚城樓骸骨俱燼事聞贈大理卿康熙
四十四年

聖祖南巡賜其墓門云傳經世澤

蔣若來字龍江長洲人獨骨臂善騎射為把總守
浦口崇禎八年闖賊至蟻附登城若來往來奔截
應刃而斃及墜城死者無算為竄百里外撫臣張
國維上其功累擢叅將明年賊從間道犯江浦若

來赤手搏賊擲賊所乘馬骨俱折復大破之拜
都督守安慶又破賊於潛山後守金華孤城援絕
先焚其妻子巷戰經日力盡自刎死

陳于王字丹衷吳縣人世為蘇州衛千戶累遷都
司僉事守崇明擒海盜王一爵殲其黨殆盡後以
事廢巡撫張國維用為中軍守備崇禎九年賊入
江北圍廬州陷和州國維遣于王守六合邑賴以
全十年賊犯太和于王將兵禦之於鄆家店賊敗

退已而數萬衆齊至圍數重諸將突圍不得出于
王手執大刀左右殺賊傷重力竭北面叩頭自刎
死贈昭勇將軍

顧維寰字含英長洲諸生煤山之變哭臨於明倫
堂巡按周一敬鳴金繡衣而來有張長瀾與維寰
奮前牽其裾曰此何時尚衣此章服耶一敬慚而
易之維寰泣曰在位者舉動如此時事可知矣歸
自經於祖墓側一敬心銜長瀾囑學使者褫其衿

長瀾遂絕意進取策杖遊四方齋志以歿

髯樵叟吳縣人不知姓名美髯長身多膂力採薪
洞庭山中負三百斤貨於人祇索百斤值人怪問
之曰吾力能負何妨均價值輕售速即沽酒痛飲
放歌歸午後又入山輒至人跡罕到之處人又怪
之答曰吾多力合遠樵近地應讓力少者忽山中
傳京師陷乃椎胸長號曰吾知天子姓朱竟換賊
李耶投震澤中死

朱集璜字以發崑山人明末貢士學為鄉邦推重
歲旱集璜佐縣令疏夏駕河邑賴其利乙酉南都
潰投東禪寺澄潭死留句云可質祖宗可對天地
生無自欺死復何愧

陶琰字稚圭崑山人執經蔡懋德之門言坊行表
後學奉為典型與朱集璜為中表兄弟聞集璜死
琰即投繯自盡

許琰字玉重長洲諸生甲申聞闖賊變大慟哀詔

至躍入胥江家人馳救之遂絕粒遺詩云忠魂誓
向天門哭立請神兵掃賊氛

周大啟字開美長洲人崇禎甲戌進士歷知黃州
府事流寇屠掠全楚黃州城已毀大啟至召民版
築西月城完遷督學道抵辰州闖賊至率土司兵
及吏民逆賊於桃源賊不敢犯甲申聞變望闕再
拜不食死士民哀慟橐葬於辰州永順司之小乾
溪立祠祀之

許王家字君聘長洲諸生素厲名節甲申聞變痛
哭不輟整衣冠赴水死同邑諸生顧所受字東吳
亦於學宮前赴水死

徐嶧字瞻淇常熟諸生孤介立品甲申之變焚儒
衣冠於文廟赴泮水死

項志寧字靜伯常熟人選貢入南都見貴人多營
私植黨亟歸挈家居湖濱南都潰屏食數日死時
士之蹈義而終者甲申則有屈坦之不食死祝舜

齡觸堦死乙酉則有馮知十徐守質邑令王鐵孫
道煥皆遇兵死

文震亨字啟美吳縣人大學士震孟弟由貢生官
武英殿中書國亡後絕粒死震孟次子乘字應符
亦死

胡甲桂字秋卿崑山人崇禎己卯副榜除南昌通
判署守事有足軍餉功遷廣信同知力守危城及
城破自經死子泓在崑山先死於難

顧咸建字漢石崑山人大學士鼎臣曾孫崇禎癸未進士授錢塘知縣戢奸宄嚴警備巡按以貪殘激變咸建調護有方四境以安及錢塘不守殉難死兄咸正字端木崇禎癸酉舉人授延安推官治績甚著舉廉卓第一後亦死於難弟咸受字幼疏天啟甲子舉人邑城破死焉

國朝尹明廷字冀階吳縣人順治己丑進士選授廣西平樂知府李定國之亂城破被執不屈死遺骸瘞

府治牌坊下子正始往粵求得之負以歸事聞

贈太僕寺卿廕一子入監

松江府

元潘世英字積中華亭人至正間用御史薦赴閩從
軍諭降興化諸寇督兵守關已而閩寇復作自安
溪突至入廨舍世英安坐不起罵賊被害

明王守信字蕉雪上海人建文時布衣授徒自給靖
難兵起憤鬱絕食死

劉仲禮字用和上海人建文四年八月以明經辟
召至應天遇靖難師入不食七日死

閔電字起光上海廩生素有膽畧嘉靖甲寅倭寇
出沒海上官軍及客兵來援者屢戰輒挫電與同
志倡義團結鄉里千人禦之頻有斬獲後戰於新
場鎮衆寡不敵沒於陣

李府上海人為南匪哨官倭薄城府與二子香黍
力戰敗之復手刃賊之夜劫城者明日復戰中礮

而死官為立忠勇祠曾孫中孚明季官劉河遊擊
甲申戰沒

顧國縉字寅美上海人萬歷丙午舉於鄉授崑山
縣教諭遷南國子監丞天啟末操江都御史劉志
選諂事魏璫倡議建祠文廟左國縉誓死力爭幾
陷黨禍會闖敗乃免遷刑部郎歷擢按察副使分
巡桂林有破猛賊楚寇功以疾請老甲申三月聞
流寇陷京師慟哭不食死

李逢申字延之上海人萬歷己未進士官工部郎
寇陷京師被執不屈身受五毒自經死

張肯堂字載寧華亭人天啟乙丑進士為濬縣令
大著聲績擢御史流賊陷鳳陽條上滅賊五事計
慮周悉時不能用出按福建數以平寇功受賚還
朝劾楊嗣昌督師無功凡所條奏懇切而中事情
後巡撫閩中殉難死時文選郎中朱永佑字爰啟
亦華亭人崇禎甲戌進士與肯堂同被難

王鍾彥字粲伯華亭人祖明時由進士歷官副使
有清名鍾彥天啟丁卯舉人授長洲縣教諭入為
國子博士累遷工部員外郎甲申三月闖賊圍京
師分守彰義門城陷被執不屈死鍾彥孝友清介
盡節之日囊無一錢其友殮而殯之

宋天顯字敬夫華亭人御史賢之孫由監生授中
書舍人甲申三月為賊所執殉節死

施溥字汝中華亭人父大經兄泳皆仕至府佐溥

以貢授順天永清衛經歷十七年遷樂亭知縣未
赴值京師陷百官皆被寇驅脅溥歎曰我父兄皆
荷國恩我豈可失臣節遂仰藥死

何剛字慤人上海人崇禎庚午舉人性諒直以節
義自許才學通練郡守方岳貢修築海塘自青村
至柘林延袤數千丈剛經紀其役三歲告成費省
工倍十七年上疏言事擢職方主事募兵金華後
以兵隸史可法城破投井死

瞿騫上海人已卯歲貢庚辰廷試特賜同進士授
滕縣知縣流寇陷城死之

衛時春華亭人青八世孫掌後府京師陷懷鐵券
闔門十七人皆赴井死

王域字元壽華亭人舉鄉薦授宿州學正流賊至
佐有司捍禦有功遷工部主事郎中出守建昌城
被圍分守南門城破死之

孫士美青浦人由鄉薦授舒城教諭崇禎八年流

寇至今以他事出士美代守七十餘日城以全擢
知深州城破自刎於角樓父訥亦自縊一家死者
十三人贈太僕少卿

吳嘉印字繩如華亭人天啟甲子鄉薦歷官南戶
部主事築海塘有功為人方正不苟乙酉聞變謁
方孝孺祠投繯死時上海陳于階為欽天監博士
亦縊於公署

侯承祖金山人為叅將守金山明亡猶與子世祿

守城城破世祿巷戰身中四十矢死之承祖亦被
獲令降曰吾家食祿二百八十年今日不當以死
報國哉遂死

徐念祖字無念階玄孫以諸生廕中書國變城破
與妻張二妾陸李皆自縊

國朝沈天成名上章以字行華亭縣人康熙十三年福
建耿逆反執總督范承謨時天成在督幕亦被械
繫錮獄三年抗節不屈及聞承謨殉節即自經死

贈國子監學正陪祀承謨祠天成工詩有聽鶻詩一卷繫

獄時作

葉映榴字丙霞上海人明副都御史有聲子順治
辛丑進士選庶吉士歷官湖北糧道康熙二十七
年武昌兵變入巡撫轅門露刀譟呼巡撫避走映
榴冒刃直前諭以

朝廷威德賊不應且逼之從逆瞋目叱之奪刀欲自刎
賊曰殺好官不祥勒入署以兵環之映榴繕遺疏

叩闕畢升公座罵賊自刎賊大驚匍匐入拜而去

事聞

贈工部右侍郎廕一子

御書忠節二字謚之

常州府

漢虞俊字仲卿無錫人少以孝友稱哀帝時為御史
遷丞相司直王莽執政召為司徒俊飲樂卒光武
即位表其墓

晉周處字子隱，鮐子，未弱冠，膂力絕人，不修細行。後改過自新，仕吳為東觀左丞，入晉累遷御史中丞。氐齊萬年反，詔隸安西將軍夏侯駿討之，令引兵五千擊賊。七萬兵敗，援絕。左右欲退，處曰：「是吾効節致死之日也。」遂力戰死。贈平西將軍。元帝時追謚孝侯。

周筵，玘兄子，歷黃門侍郎、從弟續潛聚兵將為亂。筵奉丞相睿命與義興太守孔侃協謀，即侃坐上。

格殺續還太子右衛率轉吳興內史為王敦誣害
南北朝齊蕭懿字元達南蘭陵人永元末為豫州刺
史崔慧景圍臺城東昏馳使召懿入援懿方食投
箸而起率銳卒三千赴難以平慧景功授中書令
倖臣茹法珍等所憚乃說東昏除之或勸西奔襄
陽懿不從曰古皆有死豈有叛走中書令耶與弟
融俱賜死

梁蕭淵藻字靖藝懿子封西昌侯頻莅州鎮人吏咸

稱之歷遷侍中中書令侯景之亂淵藻曰吾國之
台鼎不能誅翦逆賊正當同死朝廷耳不食而卒
蕭諮字世恭懿從子封武林侯歷衛尉卿簡文即
位後侯景防衛轉嚴惟諮及王克殷不害並以文
弱入侍講論不輟後王殷懼禍自疎諮不忍離帝
朝覲無絕賊惡而殺之

陳昕字君章慶之子七歲能騎射太清二年侯景
兵圍歷陽昕自臨川太守召還為景所執景攻臺

城令昕射書入城譎守者開門納兵堅拒不從見殺

陳蕭允字叔佐南蘭陵人通達有識鑒仕梁侯景陷臺城百寮奔散允獨整衣冠坐景軍敬焉尋居京口百姓懼賊波駭允獨不行曰性命自有常分豈可逃而免乎卒免於難陳後主嘗問蔡徵徵曰清虛玄遠殆不可測隋師濟江授官不就文帝義之厚賜帛卒年八十四

南唐陳喬字子喬自廬陵徙無錫歷中書舍人勸後
主勿降宋及城陷自縊

宋李熙靖字子安晉陵人德裕九世孫登進士第再
中詞學兼茂科歷右司員外郎忤王黼貶秩黼罷
遷中書舍人蔡攸又惡之出知撫州靖康初除顯
謨閣待制張邦昌立使直學士院固拒之愛憤不
食索筆書王維百官何日再朝天句遂卒贈延康

殿學士

蔣興祖字以承宜興人之奇孫以廕歷開封府陽武令治為畿邑最靖康初北兵犯京師過縣境或勸走避興祖曰吾世受國恩當死於是力戰而殁贈朝散大夫

胡唐老字俊民晉陵人宿曾孫崇寧進士歷知鎮江府兼浙西安撫使建康失守潰卒戚方等趨鎮江時唐老兵不滿千度力不敵乃撫之無何方欲犯臨安迫令部衆以行唐老不從諭以禍福方脅

之唐老怒罵遂遇害贈徽猷閣直學士謚忠愍

吳政字弘道宜興人博學強記兼資文武寧宗朝
以陳俊卿薦知棗強安豐軍歷任興元都統北兵
入階成和鳳等州大將王立望風潰竄政聞之一
日夜馳三百里至鎮斬立以徇力戰卻之詔進其
官後二年復戰於黃牛堡兵少無援死之追贈樞
密使

袁植字材老無錫人崇寧間進士為監察御史陳

邊防十三事以誅佞人為先不納引疾歸建炎初
召為左司諫忤宰臣出守岳州會李允文剽掠湖
湘執植植正色詆賊遇害追贈直龍圖閣

吳載堅字節齋宜興人寶祐中進士授四川提刑
按察使疏陳親賢遠佞選將練兵四事不報後與
文天祥起兵敗歸築土室居之家人罕得見其面
遂以是終

姚訢宜興人叅政希得子元兵圍常州守臣遁州

人以城降劉師勇復常州詔以訾知常州與陳炤
劉師勇王安節卮圭等力戰固守城陷不屈與炤
等皆死之詔贈訾龍圖閣待制

陳炤字光伯無錫人元攻常州炤以胸山令守母
喪姚訾辟為通判墨衰協守矢盡城陷訾死之炤
猶斂兵巷戰敗死追贈朝奉大夫直寶章閣子應
龜杜門終身衣冠不改

胡應炎字煥卿晉陵人宿八世孫咸淳中進士元

兵至常郡守姚訐署為節度判官告父總及兄應
發曰吾家世受國恩今不得復顧家矣選壯士三
千自將乘城殺元將校甚衆城陷巷戰力屈被擒
與父兄俱遇害

莫謙之宜興人為郡城寺僧德祐元年糾合義士
捍禦鄉閭詔授深陽尉元兵陷常州謙之在城中
率衆力戰死贈武功大夫時常州天慶觀賜紫道
士徐道明城破兵屠城脅道明拜不屈被殺

包圭晉陵人性沉毅有籌略元兵圍常郡守姚嵩
聞圭名引與共戰守城陷嵩遇害圭猶斂兵巷戰
被執罵賊死

元李士龍江陰人從丞相托克托南征長鎗氏掠地至
睦士龍率所部擒斬及勢不可為飲藥仰誓曰吾
報主盡矣勿令敵歆吾頭倚馬瞠目而逝年才二
十五

許晉字德昭江陰人至正壬辰冬紅巾賊陷江陰

晉與仲子如璋聚衆保護鄉里尋聞官軍駐近郊
陰遣約為內應及官軍與賊遇不利晉戰益力賊
黨復掎其後其子如璋與家僮俱破圍而入父子
俱戰沒於陣父老俱墮淚曰父死忠子死孝名其
里為忠孝里

明吳雲字友雲宜興人元翰林待制洪武中歷官刑
部尚書出為湖廣行省叅政元梁王據雲南負險
不服先遣王禕招諭之遇害復命雲往時梁王遣

使漠北鐵知院諸人為大軍所獲太祖釋之令與
雲偕行既入境諸人懼以奉使被執得罪誘雲詐
為漠北使者改制書共給梁王雲誓死拒之遂為
所殺及雲南平詔馳傳返葬弘治中謚忠節與王禕
並祠額曰二忠

王亨字仲理無錫人洪武中舉秀才擢四川按察
司僉事有威惠會紅苗破城衆數萬亨驅戍卒以
戰為賊所得縛而求金亨大罵被三刃然賊終無

意殺之乃大叫辱國如此何以生為觸牆死

陸士隆字季平無錫人洪武中舉明經拜監察御史抗疏發胡惟庸奸狀忤旨見殺妻及子皆死之
劉基為作忠節孝三歌

儲福無錫人隸籍燕山衛以好義稱燕兵起挈母妻逃去永樂初簿錄亡卒調曲靖衛仰天嘆曰吾雖賤卒義不為叛逆臣竟不食死

黃謙字損之武進人以儒生為沛縣典史靖難兵

至謙與知縣顏伯瑋縣丞唐子清集民兵五千築
堡備禦尋往東昌援鐵鉉兵成祖即位執謙至不
屈死伯瑋子清同時殉難正統初御史彭勗建三
忠祠於沛縣祀之

孫泰武進人官北平都司靖難兵起竭力守禦戰
於懷來陷陣死之

陳洽字叔遠武進人永樂間官大理卿贊大軍討
安南轉吏部侍郎復同張輔討平交趾拜兵部尚

書鎮撫其地宣德初黎寇復叛命贊成山侯王通
軍討之通引兵渡沙河洽力止弗聽遇伏兵敗洽
揮刃殺賊數人自剄死贈少保謚節愍官其子樞
刑科給事中嘉靖中建祠祀之

高雲字景雲無錫人正統中由國子生授漳州府
判鄧茂七構亂雲督軍餉次茶舖被執罵賊死贈
工部郎漳民立祠祀之

曹懷字于德無錫人正德壬辰進士戶科給事中

諫南巡詔杖嘉靖初集議大禮忤旨又詔杖創甚
呻吟中再疏論當事諸臣語極懇直出守永平調
思恩

吳玘宜興人由吏員任贛縣主簿正德丙子江西
有寇竊發勢張甚南贛巡撫王守仁檄諸軍進討
玘勇於赴鬪陷陣被殺事聞贈贛縣知縣廕子羣
入監

席上珍靖江人邑諸生有膽力嘉靖中倭寇薄城

率鄉兵禦之從東門鼓譟而出手殺數十賊東至秦家橋為賊所害

張邦鉉宜興人萬歷中由武進士歷四川松潘叅將副總兵征苗戰死懷宗贈卹

盧象昇字建斗宜興人以大名兵備破流寇撫鄖陽勦湖南北賊遂總七省軍務破李自成總督宣大畿輔告警督師入援與本兵楊嗣昌忤孤軍次鉅鹿賈莊力戰死弟象觀字幼哲有英畧癸未進

士授金谿令未上聞懷宗殉社稷赴水死

劉熙祚字仲緝武進人天啟甲子舉人懷宗末官御史按湖南時荆襄諸郡相繼沒於寇熙祚抵岳州親調兵堵截四戰四捷斬賊數千至長沙賊大至兵潰令部將護古桂惠三藩先行身引兵斷後賊追及被執罵賊死贈太僕卿弟永祚字叔遠由貢生仕至興化知府亦殉國難綿祚字季連以崇禎辛未進士知永豐縣討平山賊有功

陳震亨字百里江陰人天啟中武進士官都司指
揮流賊逼鳳陽力戰死贈昭勇將軍建祠死所又
武進王孟超亦以武進士官湖廣都司僉書山寇
甘明陽等侵岳出戰兵敗被執罵賊死贈遊擊將
軍

薛自昌武進人世襲百戶崇禎十三年署永生洲
守備隨總兵程龍征流寇萬騎猝至血戰不克死
之賊憾自昌驍勇焚其屍

金鉉字伯玉武進人崇禎戊辰進士由教授歷工部主事中官張彝憲總理戶工二部屬視諸曹鉉疏爭之忤旨切責俄削籍歸杜門謝客學日益邃十七年起兵部主事巡視皇城流寇陷大同疏請撤宣府監關杜勲專任撫臣朱之馮不聽勲果以宣府迎賊之馮死之京師陷被朝服投御河死弟鉉亦殉難我

世祖章皇帝賜鉉謚忠潔

王章字漢臣武進人崇禎戊辰進士由知縣擢御史請罷內操劾內臣冒功出按甘肅力持風紀還朝巡視京營流賊犯都分守阜城門城破賊呼章下馬章叱之賊怒拔刀碎章膝坐地大罵賊攢槊殺之家人覓尸猶一手據地張口怒目如叱賊狀我

世祖章皇帝賜謚曰節愍子之枋仕閩亦死難

馬世奇字君常無錫人崇禎辛未進士選庶吉士

授編修座主周延儒當國務引大義規切之進諭
德丁艱服除值延儒再相推遠權勢不入都及還
朝進左庶子延儒已賜死親暱者悉避去世奇力
經紀其喪時寇警日聞帝數召對廷臣世奇奏當
飭督撫鎮將約束部伍令兵不虐民人心親附賊
勢乃孤帝稱善京師陷自縊死

世祖章皇帝賜謚文肅給祠田七十畝

陳貞達字則謙宜興人于廷予以廢官戶部主事

忤璫謫順天府知事賊陷京師或勸之去不從被
執罵賊不屈賊桎其兩足投馮樞中漬以馬矢罵
不絕口而死

毛協恭字力懷武進人崇禎庚辰進士授寧德令
以廉能調繁侯官却餽遺革羨耗多惠政明亡投
水死

王孫蘭字晚仲無錫人崇禎辛未進士歷廣東兵
備副使分巡韶州獻賊犯粵屬邑多潰韶士女出

城逃竄而偽官傳檄將至孫蘭遂自縊朝命贈恤之

華白滋字紫梁無錫人少從高顧遊官養利州學正值交趾入寇城陷登明倫堂自縊死

莫可及字君愚宜興人由監生授長沙照磨崇禎癸未護寧鄉縣印流賊破縣不屈死二子若鼎若鉦奔訪遺骸俱及於難

薛聞禮武進人以吏員授黃陂主簿有惠政流寇

至聞其名欲官之挾與俱去暮即亡歸率衆誅偽
令賊復大至執之罵不絕口死

王行儉字質行宜興人崇禎丁丑進士由刑部郎
出知重慶府府常宿重兵行儉撫戢有方獻賊至
苦戰固守賊穴地入城陷被擒不屈為賊齧死

過俊民字尊伯無錫人歲貢生官臨安訓導會兵
潰邑吏皆遁俊民縊死功臣山

龔廷祥字伯興無錫人馬世奇門人崇禎癸未進

士為中書舍人知明將亡寄書其子預以死自誓
南都破肅衣冠投水死

秦之鑑字尚明武進人崇禎癸未進士令仁和數
月告歸佳馬跡山教授生徒後遊嵩山至儀封聞
當事有薦而辟之者忽嘔血卒

薛應玠武進人崇禎戊辰以監生除陝西隴州同
知明年四月流寇困城應玠率兵民嬰守百餘日
食盡援絕城陷死

吳鍾巒字巒稚武進人已見儒林傳後任桂林推官國亡自焚死

戚勲字伯屏江陰人以諸生例入國學授中翰奉差督閩餉歸順治乙酉城破大書闔門殉難中書戚勲八字于壁挈妻妾女婢二十一口自焚死同死者癸酉舉人夏維新字燦焉諸生王華呂九韶許用

國朝徐之龍字仲升江陰人順治丙戌恩貢授神木知

縣庚寅春王永強作亂之龍嬰城固守糧盡援絕
城陷之龍及二子廷綸寵綸俱死

詔贈按察司僉事

賜祭葬廕一子

華鍾本姓秦無錫人順治四年歲貢知富川縣撫
叛歸俘拊循有績亡何滇寇大至被執渡江中流
鍾投水死事聞

詔贈按察司僉事官其子訢

張令憲字嘉仲無錫人順治四年授香山知縣滇
寇破香山令憲及子丹翰皆見殺

詔贈按察司僉事廕一子知縣

嵇永仁字留山無錫人少為吳郡廩生尚氣節以
經濟自負閩督范承謨知其賢遂延於幕時康熙
十三年逆藩耿精忠將煽亂永仁勸承謨早為備
乃條上撥餉補兵安插逃弁屯田等議並請提精
兵駐上游以應變賊尤銜之既叛幽承謨別室隨

驅迫永仁至逆邸脅之降不屈誘以官爵益忿詈
不從乃錮永仁於獄重困辱之永仁氣彌厲以炭
畫壁作詩與承謨遙倡和凡在獄踰三年聞承謨
被害遂自經死事 聞卹錙歸葬

贈國子監助教雍正七年

世宗憲皇帝贈吏部尚書

特予建祠

賜御書忠節流芳匾額十一年晉

贈光祿大夫文華殿大學士



江南通志卷一百五十三